

明以來吏績

涇州風土記第十七

守令所職曹郎所掌皆吏事也昔龐士元不能治百里而薛宣黃霸爲三公則聲減于治郡任有大小不可強爲顧亦有才可任大而終局於簿領此又各有命焉未可一概論也明制知推內擢部曹出守 國初尙循其法蓋內外敷麻以成其才今考舊志參取近事錄其有名績者著於篇至若丞尉之職庠序之官皆不能專治一權并畧之不具有列

鄭福正統年貢生成化中爲獲嘉知縣約已愛民築隄防水患盜不入境獲嘉爲立生祠陞陝西金州知州州新敗

記十七

吏績

一

于漢水宇舍圯傾福至先修廟學學使者刻石紀績以漢水終爲城患於東西郭外築萬春長春二隄以捍漢流諸所繕治官不侈費民不告勞期月而畢具開市通商勸耕劬農捕虎除患任滿當代部民奔奏于朝乞留加秩叅議復任二年致政歸仍賜半俸祀金州名宦祠事載陝西通志

張文淵字好學正德年貢生官寶應丞遷含山知縣時劉六劉七等作亂剽畧千里文淵建議修城民賴以保障居官以清謹著聞和州人有獄久不決願就含山訟理文淵一鞠而定文淵嘗以孝行旌于朝從弟文弼文芊皆有吏

能文弼字右卿嘉靖元年舉人選絳州知州絳有寃獄文弼平反之府與爭是非上獄御史臺臺以文弼論讞爲是民多逋賦械繫纍纍文弼一縱舍之其人自責限及期果至逋賦盡償遷徽州同知有母訟子不孝文弼繫子于獄度其已改悔釋之後過其地母拜迎謝曰吾兒今爲孝子矣調揚州同知揚有江防操江欲文弼過江一謁文弼持不往操江有言仍執不往操江更大賢之論薦于朝陞南京戶部員外郎麻郎中以考績過家遂不復出積書万卷年八十尚不釋書卒祀鄉賢文芊字青菴嘉靖二十二年貢生大司成少湖徐公曰張生超逸之才非伏櫪下者及

記十七

史績

二

出爲蒙陰知縣徐公已典機務惜之曰以子之才乃數竒至此顧蒙陰雖小亦可展所學行矣勉之旣至擊豪強懲猾冗境內肅然逾二年以疾告歸閉門卻掃鄉閭敬仰文芊嘗言爲令無誠信以孚民縱有仁志民且以爲誑已君子以爲知言文弼子天麟已見文學文芊子天馭已見名

臣中

少湖徐公大學士徐階也明史階傳不載階爲司成階撰嚴嵩南宮奏議序在嘉靖乙巳署銜吏部侍郎前國子監祭酒乙巳嘉靖廿四年也

陳情嘉靖末舉人知孝義縣操守廉潔時有邊警繕修甌城以資捍禦邊郵靖謐事載山西通志

張雲鳳万厯十六年舉人官光祿署丞後爲鄆陵知縣罷歸與饒陽路陞安平門洞開張爾庚爲率真會飲酒賦詩

以爲樂見爾庚墓誌

王應元字杏臺萬厯二十年進士授儀真知縣憂歸再補鄆陵知縣厯工部主事南京兵部員外郎陞湖廣承天府知府所厯有聲有疑獄一訊卽決

張才安字仁吾萬厯十六年舉人官國子監學錄累陞戶部郎中出爲汾州知府汾藩肆虐才安正辭申檄藩褫爵後才安與民休息民德之

洪一緯崇禎三年舉人任漢中府漢陽縣憂歸再補蘇州常熟縣愛民以荒政箸聲

李振春字興東順治二年舉人明年成進士任濟南府推

記十七

史績

三

官再補萊州府推官訟牒盈几裁決立盡

謝彥儒字蔚涵崇禎年貢生入國朝爲汝州同知當流賊亂後白骨縱橫捐貲瘞埋之寶豐令虐激變命彥儒往署寶豐彥儒單騎赴官宣諭威德叛民投戈自新寶豐立石頌德汝州民繼叛依峒自固彥儒往撫二十四峒悉出復業陞江南都使司經歷

趙其峙順治十一年選拔貢生官汝甯府息縣潔已愛民告歸養親息人思之

趙廷琮字潤軒克中從子父選拔貢生寬見孝義志寬卒時廷琮與兄諸生廷珩皆幼母教之成立廷琮由貢生授

長蘆濟民場鹽課大使乾隆初所部水潦奉檄勘灾民造衣立石紀德

田三才字万先貢生官廣西灌陽知縣家富世著忠義灌陽地瘠民多逋賦三才下車吏請追攝三才曰無庸吏怪之未幾家使至則輦家金入官庫代民輸後罷歸民醵金償前所代輸入庫者三才不受曰此本不可爲有司訓吾偶爲之耳亦不須汝償也子自修以貢生爲鞏昌府西固同知禁火葬賑灾摘姦羌俗順化初三才方進秩遽告歸自修方陞知府亦告歸父子皆以廉退箸

右溪州十五人明九人 國朝六人

記十七

史績

四

李溟監生永樂間五任郎中皆有聲洪熙元年進階奉直大夫協正庶尹後知萊州漢陽兩府賜鐵券麻職中外罔不箸績祀鄉賢

王舉永樂間貢生肄業國學成祖幸學諮訪時事祭酒司業不能對舉對稱旨上嘉其才先是洪武十三年選國子學生二十四人爲府州縣官至是成祖復授舉爲知府劉温初爲山西五臺主簿清謹有惠政麻官九載耆老詣部請留復任九載後遷平涼知縣子孫鼎盛

辛繼烈官鴻臚寺序班崇禎十六年議裁武强縣併入晉州繼烈上疏請留其畧曰鴻臚寺序班臣辛繼烈謹題爲

城守已固請仍舊責成以安子遺事臣本籍武強縣城池雖爲湫隘士民頗知忠義十一年敵兵南下西破涇州南破武邑東破獻縣惟武強一邑獨完去年一聞敵警億兆同志自額兵外新設兵一千五百名製火藥二萬觔不動分毫庫帑皆縣中父老樂輸者閏十一月敵兵破河間突至臣縣縣臣鄭君錫親率士卒擊礮退敵衆志成城不關地利君錫年才三十丙子科登第先世將家防禦有方畧武強卽云彈丸見今保全無恙城小易守民寡實和敵兵兩至皆賴皇上威福垂庇未嘗一失今若無故弃擲以万死堅據之縣邑一朝邱墟廢城則四境無依去官則一縣

記十七

史績

五

無主無以慰父老子弟之望前時道臣檄下武強議併歸晉州父老皆欲捐軀守城已具甘結申道在案今見正月四日邸報科臣又有裁併之議滿邑驚惶臣等闔邑室廬塋墓所在誰忍輕弃其鄉經一百五十里之遙隔多盜之涇州東鹿而懸屬晉州万一疆場有虞晉州其能以長鞭及馬腹乎請仍從舊制鼓勵闔邑誓死堅守庶殉國之氣百折不回一邑獲安子遺可保幸甚幸甚臣效職五年惟知兢兢朝儀未敢輕奏一疏今裁併縣邑實切己之患不得不哀鳴君父之前伏惟鑒察疏上天子可之武強由是不廢

張仁聲字四服恩貢生順治間知蘭陽縣遷瑞州府同知時高安有劇盜官不能制仁聲一日以西刻傳集營兵先驅出城衆莫測所往明晨或報仁聲已搗賊巢穴禽渠魁矣後以營官獲過挂誤罷職流滯高安箸測天圖說算法等書事載高安縣志

張星耀字紫昭御史星法兄也以拔貢教習補中書舍人麻刑戶曹郎出爲寧波知府康熙二十九年寧波大水守便宜發倉粟不足更率先捐米八百石賑之三十二年旱飢貸關稅三千金市米平糶紹興飢民亡過界星耀設粥廠留養明年春人給粟種遣歸後舟過紹興緣岸焚香拜

記十七

史續

六

謝不絕守寧波七載思母甚因乞養寧波人數万擁大府轅門號呼願留知府活百姓大府慰留後竟卒於寧波比卒猶以未訣母爲慟初寧波諸生尸祝星耀於禮樂堂商旅又畫像祀于靈橋之滸康熙四十五年武強人具事狀上聞祀之鄉賢祠弟星輝字景昭性至孝母病巾月不解帶夜則焚香告天祈以身代母沒三年泣不輟由貢生爲兵部主事奉檄送飢民還山東官給口食銀人三兩星輝又以私財人予米三斗錢一千有子女先質豪家者爲贖還使隨父母歸鄉并由武選司遷戶部郎中銓次勾校不稍假借士悅其公吏畏其核祀鄉賢祠

辛煒字彤甫曾祖雄有隱德祖金万厯四年舉人官鎮江府同知煒生時母夢青虬入室康熙四十一年舉人明年成進士授河南宜陽知縣宜陽自流賊亂後地界不正訟牒累累煒悉心釐定一邑稱平縣有山林之饒有司籠取之絲毫不與民煒至聽民樵採一不私有官用所須平價自買一不累民縣官到任舊有墳宅銀三千兩煒卻不受爲政平恕暇輒訓迪諸生解俸以資給膏火五十二年充河南同考官權貴有請託而不行銜之未幾以鹽梟事落職士民擁道泣送百里不絕其後鹽梟大猖獗守土官皆坐罪而煒優游林下講學授徒不與其禍壽九十無疾而

記十七

史績

七

終

張陳詩字蔚侯歲貢生官中書舍人父鐸蒙難於上谷陳詩自京星馳急父難難解久之父卒遂謝病歸年三十一卒

張模字宏甫星輝子也弟渠已見名臣中模由諸生考授

鴻臚寺屬出爲永甯

一作養利

州州故猺獞地僻險頑獷模至修

孔子廟設義學禮師儒興教化於嶺路險峻處築亭置產以惠商旅禽豪民恣橫者寘之法州有防守狼兵舊給官田令自種已而查報墾荒吏以兵所種官田入墾籍中狼兵失業則勾連猺獞作不靖模爲別檢荒田符墾籍還官

田於狼兵兵以無事後署桂林府同知駐明江明江土人五十三寨潛謀作亂模偵知之則遣辯有口者往諭以利害順逆應時解散模以憂勞冒暑暍致疾疾篤歎曰吾瘁一身活數万人命何憾竟不起

石其灝字子蒼康熙五十二年舉人教授鄉里二十餘年選爲河南葉縣講學勸農開溝洫建橋梁修志乘斷獄平恕乾隆十二年奉檄辦賑陳州陳州人欲立碑紀德力辭之尋告歸年六十四卒子碩康熙五十六年舉人

賈士俊康熙五十六年舉人官城武知縣祖逢慶康熙三十四年舉人麻官元城永年教諭有賢聲父廷梅康熙三十

記十七

史績

八

八年舉人官肥鄉教諭肥鄉縣志稱其淳樸寬厚言動不苟教士以禮人服其化至士俊仍三世領鄉薦士俊之官迎養其父時城武仍歲水災廷梅誡子曰此万姓待命時也爾其慎哉士俊盡心賑卹活二万餘戶廷梅乃一色喜郭維雍正十年舉人官安徽東流靈璧二縣有惠政服闋再補陝西西鄉知縣身禽巨盜曰半截塔者盡法治之盜風遂息

郭兆夢字文載父陵諸生嘗建義塾於鄉施田五十畝給師生膏火又嘗建橋濟衆縣人重其齒德兆夢以貢生簡發陝西試用知縣時西陲用兵從軍出塞至木魯烏斯以

軍功授安徽定遠知縣定遠有盜據磨盤山爲害兆夢設
方畧禽之遷泗州知州州瀕洪澤湖民或侵耕湖淤地官
吏計畝徵稅湖漲田沒而稅如故兆夢爲請于上蠲免之
遷河防同知陞延安知府立講舍擇師儒進十縣子弟迪
之學人文日適上以延安民貧多逋賦上書願代民輸賦
坐違例被劾部議寬免駁使復官竟謝病去子十人皆賢
賀雲鴻字健翮乾隆四十四年舉人官陝西大荔知縣調
富平咸陽盩厔澄城四縣署孝義廳同知有政績雲鴻祖
琇性至孝有文李文貞爲學使第其文爲正定府屬三十
六縣弟一老爲鄉飲賓事見孝義門父仁聲乾隆二十四

記十七

史績

九

年舉人有文學以振起人文爲己任就養大荔大荔同州
首縣士氣浮囂書院考弟諸生高下稍不協輒大譁知府
高公請仁聲弟榜揭諸生竊言是非高公曰汝知校閱者
誰乎賀太公也諸生乃帖服不敢異議部選當得官不出
嘉慶元年與千叟晏 賜御製詩壽杖荷包綢緞等事年
八十三卒雲鴻嘗乞病假會陝西有教匪之亂仁聲趣之
起曰此豈臣子偃卧時邪後雲鴻思親欲歸養仁聲貽書
切責之曰軍書旁午聞汝數有軍役當竭力報國家奈何
效兒女子戀親戚乎雲鴻捧書以泣遂不敢告養仁聲三
子長卽雲鴻次雲錦嘉慶元年舉人不仕次雲舉字慎舟

嘉慶三年舉人二十四年進士麻知靖江鎮洋阜甯高淳
四縣署蘇州督糧同知在阜甯歲飢捐貲益賑有豪民聚
徒數百強求賑已雲舉出言於制軍合兵禽治之一縣稱
善在高淳東西兩壩姦民爲商旅害徒黨多前令不敢禁
雲舉至則痛懲之行路感悅縣宅傳有怪前令相戒不居
雲舉命掃除盛儀仗鳴鑼而入怪亦竟絕在靖江淮北大
飢流民來者日千百計雲舉計口給錢處之高燥地旁開
溝滲溼命鑿巡視疾者灾民至靖江如歸廬舍大府下其
法他州縣使盡師靖江長於聽斷他州縣有滯獄上官輒
令雲舉往讞讞得直者輒尸祝之兩爲同考官得徽州程

記十七

史績

十

葆字鎮北憫其貧留之官所親教之葆卒成進士以道員
全家殉節爲忠孝家雲舉以老致仕歸裝惟圖書數万卷
至今畿南藏書家稱賀氏年八十五卒子式韓嘉慶二十
三年舉人官戶部江南司員外郎孫錫珩錫璜并舉人曾
孫濤沅并進士濤爲刑部主事以能古文名于世沅由庶
吉士改福建上杭知縣而雲鴻孫錫璋進士大名教授曾
孫爾昌由翰林院編修出爲保甯知府再補同州知府玄
孫曰嘉枏者舉人有幹材與余善

右武强十六人明四人 國朝十二人

張文行字宗教嘉靖四年舉人仕太原府同知任事無所

避遷南京戶部員外郎督鳳陽倉儲權量平憂歸服闋再
補戶部員外郎督太倉明年移差漕運絕請託禁科歛爲
忌者所中罷歸歸而數捐貲賑鄉里多任卹之德祀鄉賢
王文學字汝科嘉靖十九年舉人初仕河南延津知縣再
補山東金鄉知縣遷陝西行太僕寺丞剛直不畏疆圉麻
三官皆有聲祀鄉賢
路曄字奕菴由貢生爲太原府通判陞海州知州廉明有
惠政致仕四十年杜門不預世事祀鄉賢子陞見名臣記
中

王命字欽甫嘉靖四十三年舉人隆慶中除鳳翔知縣廉

記十七

史續

十一

介不苟巡按御史行部至供張疏惡御史歎爲古人後以
忤上官歸事具孫夏峯畿輔人物攷

周俊彥由歲貢生爲魏縣訓導陞山東朝城知縣有惠政
祀鄉賢

翟文鳳崇禎八年進士入國朝爲彰德知府買妾方氏
詢知爲南昌望族先嫁守備張君生子信已四歲兵變流
離至此文鳳不納以其無歸也留而客養之蹤迹張信凡
四十餘年至康熙二十八年文鳳孫登雲始得張信而還
其母

苻應琦順治二年舉人十二年進士授主事後出爲歸德

知府罷歸郡中賢士大夫爭爲詩歌文辭以送之聯爲大
卷子孫傳寶之弟應琇順治五年舉人

王柔徽字懿恭康熙五十六年副榜貢生官古浪知縣在
官重農訓士惠商尋告歸年七十舉鄉飲大賓好學工文
有古浪記見菽文

常如楷字司直咸豐五年舉人官內閣中書謹飭明掌故
出爲寶慶知府有能名子孫多嚮文學

右饒陽九人明五人 國朝四人

陳芳字子華永樂間以貢生授濟源知縣有能聲流移來
歸豪強斂跡事載濟源縣志祀鄉賢

記十七

史續

十一

賈斌山西行都司天成衛令史景泰間上疏言漢桓靈唐
文宗宋徽欽皆以宦寺專政致敗太上皇蒙塵亦坐此輩
臣謹輯厯代亂國宦官及直臣諫疏都爲四卷名曰忠佞

錄冒死進呈御覽坐妄言削籍歸

明史斌商河人安平舊志在史前
史又謂斌書爲忠義集均疑史誤

蘇洪宣德八年進士官工部主事博通經史嘗獻平夷策
禦虜圖於朝時論稱焉見明一統志洪少與張鳳同學時
時面斥鳳過及鳳貴洪爲鳳屬官猶不改鳳亦待洪如初
聞其貧卽周之見明史鳳傳

王學孟嘉靖四十年舉人學問博雅自守甚嚴官綏德知
州罷歸時宦橐蕭然事母孝讓產於兄祀鄉賢族子民瞻

字參所由選拔貢生爲雒南知縣晚歸林下二十餘年樂道尙玄三子五孫竝負時名亦祀鄉賢

郭聞禮字趨庭萬厯四年舉人官河南閩鄉知縣居官有績閩鄉人刻石頌德陞南昌通判祀鄉賢

張爾庚字應白父玠爲諸生鄉人敬憚之爾庚万厯三十四年舉人官滑縣教諭學使者所至求劣生罰之滑獨無有學使盛氣須爾庚曰滑無劣生其教官速化之功乎對曰曷敢爾朴作教刑儒學官自有夏楚若必上聞是絕其自新也若巨奸大憝則誠無有學使改容謝之遷鎮平知縣興文育賢輕徭少事歲飢率先捐穀五百石邑人化之

記十七

史績

十三

輸穀至數千石活人万計遷許州知州以忤巡道解官歸入國朝順治四年大中丞郝晉以先朝遺才薦堅臥不起年七十二卒

吳從誨字洞如崇禎三年舉人爲懷慶府通判十三年冬流賊欲乘凍渡河從誨守禦河干賊不得渡明年懷慶將劉超叛盜賊乘間蠶起擁衆剽掠從誨設計悉禽之巡行河上寇卒至率鄉兵守禦親冒矢石焚賊舟十七艘十五年遷曹州知州曹經流寇擾亂邑無居民至則繕城郭招流亡貸逋賦甲申海內大變而曹人安堵從誨力也大清定天下遂罷歸不仕鄉里稱爲曹州君年八十親見冢

孫本植選內弘文院庶吉士爲會試同考官逾年始卒祀鄉賢曹人祀之名宦

崔冕字服之崇禎九年舉人順治十三年就官樂亭訓導康熙七年補薊州學正十年陞廬江知縣賑荒寬賦政聲傳遠邇一年卒官子甲默已見文學

郭金鉉字仔侯聞禮孫崇禎十二年舉人順治六年進士授中書舍人遷戶部主事權鳳陽稅有惠于鳳陽人遷郎中權滸墅復命之曰不染一錢家居嘗置義田三百畝贍宗族卒祀鄉賢

武韓字彤函父應元崇信教諭教士以居敬致知之學崇

記十七

史續

十四

信缺令應元攝令事治尙德化暇則聚徒講學山西石鳳臺時在陝相與論學累月甲申解官歸杜門屏客年六十一卒韓應元少子四歲而孤母翟孺人食貧採樹皮草根哺韓從伯兄學天寒埽敗葉夜然以照讀康熙二年韓年才弱冠已領鄉薦以事母不欲仕進後同年生姚啓聖開府閩中辟韓爲幕府亦以母老辭不就母終養後康熙卅一年始謁選得鹽城知縣先是淮揚所屬高郵寶應興化泰州鹽城等州縣濱河負海多荒田鹽城尤居下游荒田九千九百八十餘頃廢屯田一百二十一頃逃亾三萬九千五百餘丁康熙二十九年部議墾荒田升科自後積逋

賦十餘万百姓逃徙不還韓至則力請豁除前後詳揭百餘上大府以格于部議難之韓坐徵賦遲緩降級者七罰俸者五而申請益堅至謂一官可弃七尺可捐凋敝罷甿必不可重累督撫漕三院鑒其誠合䟽題請於是自鹽城洎高寶興泰九荒田二萬四千二百三十三頃累歲積逋賦悉奉 特詔蠲除著爲令淮揚數百万戶歡聲雷動翳韓之功在官粗糲菜茹惟以一二老蒼頭自隨日費錢二十文已足退食則親種韭後圃往時鹽城有流寓編銀九百七十餘兩前後令相循踵據爲私人韓一不取布政使聞之從容問韓曰令裁汰流寓編銀豈有點金術乎韓對

記十七

史績

十五

曰奉錢自有餘非敢矯廉也韓爲政嚴明奸吏不敢欺然不能阿曲詭隨人終以此罷三十五年 天子親征噶爾丹于襄勤公薦起韓運餉塞外明年又運餉寧夏三十七年于公巡撫直隸奉 命濬渾河奏韓自隨工作未成卒於固安工次年五十六妻門氏聞訃以死徇韓初喜言兵兼涉佛老後與吳玠同上公車相與講求義理之學其學以求誠爲宗於西江之頓悟永嘉之事功新建新會之枝分派別莫不深入而辨晰其纖微離合而卒折中於濂洛醇如也其卒也于公深悼惜之

弓椿字蔭長乾隆九年舉人十三年進士麻官雲南楚雄

劍川石屏姚安昆明等州縣皆有聲在劍川時邑東南有湖方六七十里名劍海海西南有海虹橋湖水由橋下宣泄地震水道壅塞瀕湖居民皆苦昏墊椿開通水道湖水暢流事集而民不擾後官至懷慶知府
蔡鴻章乾隆中知黔陽縣不忍鞭笞其民以事至鄉鄙進父老子弟勸以孝弟力田去之日民揮泣送之

右安平十三人明八人 國朝五人

凡一州三縣仕宦所著績具如此至如洪武時饒陽劉格以舉人官項城教諭士情者扑責不假借而涇州有李奉祖官安州吏目李守仁官嘉興府知事張敬官介休縣丞

記十七

史績

十六

王皓官金鄉主簿此四人在洪永朝皆以人材徵用及嘉靖時武強張奎官蒲城主簿請休不許竟浩然歸去而于士遜爲金壇丞禦倭有方皆卑秩小官有卓越之蹟見於前明入 國朝順治時涇州王元顯官鞏昌府經厯修輯府志署通渭秦安二縣皆有去思之碑康熙時陽曲丞魯擎柱署靈石知縣能擊豪強公安丞李僕能築隄禦水年二十餘能乞養辭官及執親喪能行古喪禮而安平亦有岷縣丞門有年能以廉名卒官而縣人爲治喪具其武員則涇州石鑰爲岳州督運千總以挽運致隕何光裕爲荊州衛守備以勘災遺愛此六人皆卓卓可紀其儒學官則

明世沙河訓導康應鸞 國朝遷安訓導王正宗大城教
諭張世瑞通州學正尹澍密雲教諭侯世憲滿城訓導張
國成皆涿州人明世開封訓導張五倫 國朝南和訓導
郭蘭遼陽學正張令譽正定教授賈鳳吟肅寧教諭劉潤
皆武強人雞澤教諭王德涇饒陽人阜城訓導李長滋子
內邱教諭樹碩安平人類皆能舉其職而王正宗以孝行
受旌建坊李長滋擬陳時政而不逐聲利賈鳳吟則 高
宗皇帝稱其才堪民社張五倫王德涇皆救人之厄卻千
金五百金之餽尤其傑出者也不復具載本末竝附箸於
此